

吳文節公遺集

吳文節公遺集卷五十二目錄

公牘

會撫院通飭各屬力行保甲札

會滇黔撫院通飭各屬籌辦團練札

吳文節公遺集卷五十二

男養原謹編

公牘

會撫院通飭各屬力行保甲札

爲通飭實力奉行保甲以靖地方事照得州縣須行保甲夫人而知之矣行保甲而貼門牌立頭人夫人而知之矣以其知共能之事並未見一處行之而著效者實並無一人眞能行之而求其效者也本部堂院到任已逾一載各屬搶劫重案層見疊出雖屢經嚴札而不見盜案減少者總由該地方官未能實心實力清理也夫實

心實力清理地方舍保甲更有何術差衙役下鄉貼門牌而索費魚肉鄉民一弊也委分防佐雜編查貪婪而濟以酷虐二弊也照例立甲長里老牌頭任其武斷訛詐鄉愚三弊也地方官全無眞實爲民之心不過奉行故事以古人之良法美意致使民不聊生可勝浩歎而無能之俗吏必曰滇省游民最多加以廠地之混雜沙獵裸夷之分處非如別省之可以保甲統之也不知正因滇省與別省不同而保甲之行較別省爲更要游民多則設有客長客長得其人稽查出入分別去留則游民之保甲也廠地則設有課長碉長課長碉長得其人

搜其來歷辨其良莠則廠地之保甲也沙獮裸夷則各有頭人頭人得其人因其風俗嚴其責成則沙獮裸夷之保甲也因地制宜乘時利導古法可行而不可泥是在爲民父母者心誠求之也方今粵匪鳴張湖南會匪散布勾結不於此實力講求該地方官豈有把握耶夫保甲之行在官而官之行保甲尤在於得公正頭人公正頭人之得豈易言哉官不與紳民相接不能得地方公正之人官與紳民相接恐公正之人未必得而藉此以招搖者其弊百出須我用紳民而不爲紳民所用則其中操縱自有權衡久之得紳民中一二公正之人又

於此一二公正之人復舉所知公正之人拔茅連茹徧
於城鄉則里老甲長牌頭盡得其人而保甲眞行矣行
之始或稍覺其勞及行之已成則於境內燭照數計百
里如在目前在官則高懸明鏡在民則眾志成城樂何
如也本部堂院於古人保甲成法摘其簡易可行者十則
通飭各屬該牧令其細心揣摹審時度勢實力奉行於
神明變化之中而得斟酌損益之妙果能著有成效定
當

奏予升遷倘仍視爲具文置之高閣以致盜賊肆行卽
當立登白簡試問知州知縣於該州該縣之戶口多少

民風淳雜一無所知顧名思義能無汗下行保甲者其深念之本部堂院不時專人潛行抽查毋得以一稟了事甘於自棄也切切特札

一定編列戶口之法各地方挨門順戶每十戶編爲一甲每十甲編爲一保每戶各置一門牌無分紳衿軍民人丁多寡逐一填寫籍貫年貌生理如係已房卽填註已戶如係典賃之房卽填註典賃某人之房係外省人卽填某省州縣人典賃某人之房又如村落中止有十三四戶准共編一甲止有六七八戶亦編作一甲如孤村三四五家亦編作

一甲不必取盈於數除每戶各置門牌外每一甲
仍共置一橫長牌總書十戶長年貌籍貫並十戶
人口數目責成州縣正官親標印記如有來去存
亡增減姓名本戶至甲長處告知改註門牌日記
簿內每月朔甲長同保長約正彙報正官改正底
冊

一編列要公平各保甲在城者或以府縣衙門爲主
分別東西南北四至以辰宿列張四字分爲號數
編之或照原鋪編之在鄉者亦照里甲都圖挨次
編之不分紳士軍民富貴貧賤一體挨編此係排

門保甲無事互相保守有事逐戶挨查非有支應
差遣之苦若一經優免便生規避且盜賊之警富
貴貧賤雖均受其害究竟富貴家干係更大如富
貴家優免止責貧賤者守望救助其誰甘之

一編列要周徧各處寺院菴觀多停留遠方僧道不
明之人或侶行邪教惑眾結拜爲害地方須一體
編入保甲冊內娼優家尤奸盜藏匿之所應令開
報以便稽查不便與良家同編另置一牌卽與良
家同編亦可官須暗加記註毋得遺漏

一巡行要親到州縣正官每月量擇一二日乘肩輿

省騶從巡行鄉村隨意抽查卽家道之貧富錢糧
之完欠亦可一覽無遺不許多帶人役騷擾地方
須大書禁約示眾仍查點鄉兵令其學練技藝嫻
熟者犒以酒肉稽考社學令其訓讀課勤書熟者
獎以筆墨卽窮鄉僻壤必須周徧不得遺漏致有
向隅

一火盜要救護每甲置銅鑼一面以便臨時鳴號每
戶各置刀槍木棍等器械以便臨時防護每一甲
每一日挨輪一人晚間執牌往各戶門首查訪有
無出入人戶及面生可疑之人隨卽傳報甲長登

日記簿內夜間在十家門首往來擊柝以備不虞
遇火盜諸警卽鳴鑼爲號一傳十十傳百齊執器
械併力救護不許畏避不出尤不許乘機搶奪事
畢聽甲長會同保長按牌查點不到者卽登日記
簿轉報州縣以憑查究如甲長查點含糊不行實
報及各戶不服查點互相推避者一併究問

一保甲長要得人每甲卽於十戶內按糧冊選有家
有行者編爲甲長每十甲卽於百戶內按糧冊選
有家有行者編爲保長須四十歲外五十歲內者
方有精力支應編定後州縣正印官卽將保甲長

年貌籍貫親註冊內仍置油腰牌書給之止令朝夕專心化導鄉民平時止聽正官調度稽查不許委佐貳捕官查點滋擾

一保甲長要優禮保甲長專爲化導鄉民而設卽地方有事毋得擅行拘喚致傷體面如果日久奉行不怠酌給花紅扁額以示獎勵如於每月朔望循例鄉約點卯時逐一喚入內堂屏去書差親加詢問有事來署時賜坐面談亦好該里有無習教傳徒窩留賊匪敎唆詞訟倚強欺弱聚眾結盟之人令其報舉詢畢一人再詢一人曉以斷不令人知

爲某人所言致有報復之累密行登記以便遇有
該處紳衿覆加體訪互相印證隨時舉發無不驚
爲神明

一凡置十家牌先將各家門牌挨審的實如人丁若
干必查某丁爲某官吏或生員或當某差役習某
技藝作某生理或過房出贅或有某殘疾及戶籍
田糧等項逐一查明十家編排旣定照式造冊一
本存官以備查考遇有勾攝差調等項按冊而稽
更無躲閃脫漏一邑之事如視諸掌每十家責令
查報甲內有無習教爲匪竊盜及教唆詞訟之人

投具隱飾連坐結狀互相覺察則盜賊可息十家
內有爭訟等事同甲卽時勸解恃強不聽者相率
稟官又每日互相勸諭務令講信修睦息訟罷爭
則詞訟可簡其法至約其治至廣因是而修之補
其偏而救其弊則賦役可均因是而修之連其伍
而制其什則外侮可禦因是而修之警其薄而勸
其厚則風俗可淳每日聽訟時抽取底冊逐加核
對不必下堂卽與親查保甲無異

一定里甲法凡里老諸人各舉德行著聞通明道理
者使爲一里模楷此卽古重德尙齒之意邇來不

問德行年齒何如惟於一里中頭甲第一戶使爲
里長老人以至十里皆然類皆貪暴無恥棍徒日
以侵吞弱戶爲計兼以不才有司刁惡衙役需索
里老里老因一科十民之呼天籲地誰復卹也至
於地方鄉約保正諸人類皆一丁不識貪鄙棍徒
有司任意作踐彼等彼等任意橫行鄉里欲化行
俗美惡可得乎應令一里百戶中選高年有德通
曉文理者數人擇其尤賢者爲里長有司以禮相
接次者爲老人或本里德行可爲人範者使爲鄉
約正副又選公廉識字之人使爲地方總甲每里

擇寬閒處所爲會講之地每月約正副里老地方並本里人戶咸聽宣講

聖諭互相勸勉於風俗人心更存裨益

一值凶荒之日卽以本里之富賑其本里之貧則數少而易給不以難繼爲憂因以本里之貧雇於本里之富則計功受值不以冒食爲愧卽有罷癃殘疾老弱婦女安坐而食數亦無幾富者亦可作功德想不必斤斤計較天下郡邑南北異地風土異宜廣狹異制均之一法或用之此邑則安用之彼邑則擾有未可一律拘者惟在臨期相機變通各

隨才力斟酌而行之耳

會滇撫院通飭各屬籌辦團練札

會黔

爲通飭速行籌辦事照得粵西賊氛甚惡其尙弟會匪現在圍攻桂林省城各處土匪亦聞風四起粵省官吏更不暇顧及縱使各路援兵能解桂林之圍賊必四出流剽而粵西已無可剽掠安保其不擁入滇黔思據一城池爲藏身之固卽不思據城池安保其不擁入近邊村寨爲掠取財食之計滇省各處防堵已將及兩年現在在事文武均寢以懈怠此時若添調大兵雇募多練不獨事無了期經費無出且兵不足恃練不可信該在

事文武豈不知之然則將束手以聽其蹂躪乎抑委心

以倖其不來乎均不可也爲今之計急須堅壁清野齊

心團練官有救民之心民自有從官之樂官民一氣何

賊之不能禦哉

本部院雲南撫部院

前於兼署督院任內曾

通頒條約飭令舉行有視爲迂而不欲行者有畏其難

而不肯行者有空稟飾覆而並未行者本部

堂院現在察

核賊情求爲有恃無恐之策舍此更無別法卽如雲南

廣南府上年將築關設卡聯村齊圍名事宜實力舉辦

尙不過十分之四五而迭次殲獲賊匪官與民俱覺得

力現在貴州黎平府辦理築堡齊圍事宜不獨民無怨

言且無不踴躍從事可見效可立覩事在人爲畏難苟安貽誤不淺矣難之者曰滇黔跬步皆山村落星散勢有難行殊不思山多正有險可守村落散而民心可聚全在地方文武有誠求保赤之心身到心到口到神明變通何地不能行哉難之者又曰小民難與慮始現在賊蹤尙遠而必欲無病呻吟徒滋騷擾勢不可行殊不思民卽至愚未有不思保其室家性命者如果官能實心實力代謀其身家無異自謀其身家民安有不信從者騷擾滋弊則奉行者之不善非法之不善也前人云有弊則當易人而不可易法至哉言乎畏難苟安者又

安能藉口耶本部堂院現將黎平府胡守通論必須築堡齊練緣由文一篇並本部堂院采集前人成議成法成效參以時事彙爲仿議一篇刊刻訂成一本通行頒飭爲此札仰卽將發去說略仿議先自行悉心靜氣字字紬繹推尋再分散與武營員弁及紳士耆民暨夷苗寨長頭人同閱同心講求其不諳文義者令人以粗話轉相譬喻告之一面剋日親身周厯四境目計心營何處爲賊所必曲之路如何斷歧途設伏以待之何處爲賊所必爭之地如何扼險要併力以守之何處必須築堡何處不必築堡而必須聯村何處小村可以附併大村何

處大寨可以包絡小寨其小村寨零戶口卽附於大
村寨冊尾統以大村寨頭人平時雖不必搬移臨事必
易於呼應某村某寨如何出丁備練其丁練如何造冊
按操其器械如何借給如何就自有者備用其平日如
何由官集操酌犒其賊來有事如何給與口糧其富戶
殷商如何出貲存公備用其在官之壯練汎防之弁兵
如何與民聯爲一氣隨時響應各按各處地勢各處民
情逐件舉行一面開列形勢章程繪圖貼說馳稟察奪
事關備預逆賊至緊至要毋得玩視致干叅革治罪切

切

吳文節公遺集卷五十三目錄

公牘

批署開化鎮稟覆營中各汛坍壞卡房未及修復由

批騰越鎮稟查辦土司由

批元江州詳夷民王巴得被王老四等毆死燒屍滅迹由

批霑益州詳李起坤被丁有恆等毆傷身死由

批霑益州詳訪聞差役武聯魁藉差訛索斥革究辦由

批龍陵廳等會詳婁學祥家被劫獲犯由

批平彝縣詳陸奉家被賊行竊臨時行強拒傷事

主之妻身死由

批新平縣稟訪獲棍徒萬保鈴糾眾逞兇訛詐由

批麗江縣詳唐得等刀傷趙國俸並毆傷差役和

升由

吳文節公遺集卷五十三

男養原謹編

公牘

批署開化鎮稟覆營中各汎坍壞卡房未及修復
由

據稟該署鎮自上年十月到任曾與張署守籌商擬將各處坍塌汎卡興修旋因赴廣南邊界督辦防堵繼又赴馬白查辦賊匪之案遂將修理汎卡事件耽延等語此無理之謠安能欺本部堂耶該署鎮到任已及一年其赴廣南赴馬白係本年五月以後之事爲時亦不過

月餘旬餘何至耽延且前此半年有餘高坐衙齋飲酒作樂儘有閒時又因何事耽延耶此其任意說謊者一也又稟稱各處卡房稍爲損壞之處飭防弁自行修補其有倒塌僅存基址者該卡守兵向係寄住於鄰近民房卑職猶恐該兵偷惰每月派弁往查三次皆由卑職另給盤費等語更屬混說無論民房不能借與卡兵居住且如下築橋卡如果尙有防兵在鄰近居住該外域土目何敢越界至芭蕉嶺建卡一處如此他處可知此其任意說謊者二也至稟稱卡房應文員修建現因工程停止文員礙難請修營中又無項可籌等語此本部

堂逆料該署鎮必以此語來頂塞者查該鎮營現在赴
司請領公費銀四百九十餘兩製造皮盔棉甲查皮盔
棉甲平時既不用出征又不用何須製造况該鎮營原
不製造不過借此名目領去公項爲上下員弁朋分之
計耳本部堂始擬批駁繼而不駁者正心計該營中或
有事須急辦而無項可籌無名開銷之件可藉此通融
辦理耳乃該署鎮竟將託名盔甲之項領去公肥而坍
壞卡房明知工程停止文員不能請修則諉之應歸文
員修理實屬貪庸狡猾可恨已極仰卽將現在已領去
之實銀四百四十餘兩移作修理各處汎卡房屋之用

仍以製造盔甲報銷該署鎮交卸在卽此事必責成該署鎮一手經理卸事後須將各處卡房一律修竣稟請委員查驗始准來省銷差速宜凜遵毋違干咎此繳

批贍越鎮稟查辦土司由

據稟卷載二十七年于崕土司刀如玉之孀嫂刀賴氏呈控三子被殺一案經彭永札飭刀如玉稟覆旋據刀如玉稟稱三姪心懷謀奪掘其父墳欲其速死當傳總理族眾人等會議詎夷眾怨深一朝除滅不及禁止等語刀如玉明言不及禁止其爲知情嗾使已情見乎詞縱使實不知情卽此不能禁止夷眾妄殺之咎已無可

追此當嚴究千崖土司刀如玉之不是者也其刀如玉
暨千崖蠻葵住民楊枝林等呈控戶撒土司蠻掌族目
勾結野夷攻破蠻葵殺傷多人佔據該處一案據戶撒
土司賴有位稟稱蠻掌雖係戶撒木一甲之地蠻葵之
攻係野夷藉口刀賴氏子死無依代爲報復等語查刀
賴氏有依無依與野夷外匪毫無干涉若非該戶撒土
司之蠻掌族目從中勾結夷匪何敢輕涉其地該土司
賴有位是否知情指使雖不可知而其不能約束族目
糾匪妄爲已無可辭咎此當嚴究戶撒土司賴有位之
不是者也乃該鎮暨前廳彭永並未澈究清理但飭刀

如玉接回刀賴氏婆媳撫養刀永清遺腹幼子飭賴有位退還蠻葵土地取具釋怨敦好印結顚預完案而刀永福刀永清刀永敬三命之案曾無著落攻破蠻葵殺死楊枝汝五命之案亦無著落此完而未完也無怪乎結案未久而戶撒屬夷又復越境擄掠佔住蠻葵干崖屬夷亦復奪其蠻掌木一甲之莊寨互相爭鬪各有殺傷也查土司所屬夷民蠻觸相爭本當責成土司按理清辨就夷法分別治罪息爭倘各該土司庸懦無能不能鈐束族夷致有妄殺妄爭之事或竟係各該土司自己起意帥令族目夷民妄殺妄爭均應叅革治罪將士

職另行承襲以靖邊圉此流官之責也况兩造均呈控
到官尤不能置之不問也仰署雲南按察司會同布政
司巡西道卽飭永昌府會同騰越鎮廳將千崖土司刀
如玉戶撒土司賴有位一併傳案並提齊人證將該土
司等厯年妄殺妄爭衅由徹底究明秉公訊斷以杜蠭
爭而肅邊境倘再因循延謬別滋事端卽惟該鎮該府
該廳是問至現稟內所稱刀永福等被殺一節經刀如
玉查係族目刀岳猛父子所爲卽刀賴氏初呈亦有刀
如玉遺族阮刀岳猛將伊子殺斃之語是刀岳猛實爲
案中要犯何以前任賈丞旣將刀岳猛等提到因其狡

不成招遂亦置之不究現在刀岳猛父子釋放耶在押
耶楊丞現稟內所謂照案嚴催者所催何事節次勒提
者所提何人皆不過隨意搪塞之詞耳並嚴飭知之其
賴有位現控搶馬一事乃案中之末節耳不足深究俟
妄殺妄爭之案究明讞定此事數語可了耳再土司之
匿不到案者非畏縮也亦非抗違也向來土司一見流
官則文員之丁胥差役武員之屬弁目兵士儀門禮詐
索不休該文武或昏而不知或知而故縱流官之所以
不能威服土司而土司之敢於輕視流官者坐此也本
部堂之所以飭將書差先行收禁者正洞此病也該司

卽一併嚴飭該府該廳等知之力行之勿忽仍錄批報
明撫部院並候批示繳

批元江州詳夷民王巴得被王老四等毆死燒屍
滅迹由

此案起釁根由及現訊鬪殺情形均不確實何以知之
於燒屍滅迹四字知之凡命案之燒屍滅迹者大約多
係兇犯一二人於僻處致死人命滅其迹以免人知抑
或見知者雖不止一二人而死者係不知姓名之人或
雖知姓名而屍親隔遠不知滅其迹以免屍親之訪覺
而指究也故自來燒屍滅迹之案皆係恐人察知而發

覺也非然者又何取乎滅迹哉此案見殺之證已到案者已有楊六黃哈六二人屍妻當時聞知屍子當場目擊欲發覺卽發覺矣屍縱燒而迹何能滅亦何必滅哉且據訊卽由事涉家務彼黃宗保楊喝二李得波諸人者干渠何事而欣然一同下手胡爲者明係牛叢挾讎燒人之流毒特更加以刃砍耳急宜徹究痛懲何可以尋常鬪殺消弭化案哉况屍子王得厄是否僅止被嚇不報抑尙有知情同謀之處案關倫紀尤不容絲毫顚預仰署雲南按察司卽速提案來省遴委賢員悉心研審務須核實究辦另行錄供詳奪仍錄批報明撫部院

並候批示繳

批露益州詳李起坤被丁有恒等毆傷身死由
刀既落地則刀背刀口應平擺在地斷不能刀口向上
致有墊傷且用力過猛刀子落空連人跌地是向前撲
跌也縱使刀背適嵌石縫刀口向上亦當墊傷臂膀斷
不能墊傷脊背而遑問乎穿衣未穿衣耶此層情節於
兇犯罪名並無加損然亦可見該牧讞案之糊塗辦案
之草率於吏治殊有關繫仰署雲南按察司嚴行申斥
速飭再行研審起衅共毆致傷身死究明有無預糾謀
故別情並死者脊背刀傷一處究係如何致傷悉心嚴

鞠務得確供按擬招報仍候撫部院批示繳格結存

批霑益州詳孫學周卽孫周姓行兇擾害由

據詳所訊孫學周行兇擾害之處只王朝選一起欺弱詐錢可爲擾害實述其唐尙位孫大娃二起尋常鬪毆耳至孫吳氏李鄧氏二起已各據姦婦承認調戲成姦卽不過和姦枷杖罪名耳該州欲將孫學周照兇惡棍徒辦理自必其人實爲地方之害而所訊供情又如此不實不盡不知將來供與看如何相符情與罪如何相協該牧身膺民社者有年如此糊塗庸冗遇事全不肯用心可恨已極仰署雲南按察司核飭另行確審另詳

察奪仍錄批報明撫部院並候批示繳

批靄益州詳訪聞差役武聯魁藉差詭索斥革究
辦由

該州能知不袒縱差役大屬媿奮可造但似此詐索之事豈止武聯魁一人武聯魁平日之詐索又豈止此一案現訊犯供稱素來安分不敢妄爲等情猶屬狃於積習掩飾之詞仰署雲南按察司速飭再行研審藉差詐索實在得贓數目此外詐索得贓實有幾次毋得僅據該犯狡避之供率行定案再武聯魁之外其平日肆行詐索魚肉鄉民者尙有何人均須逐一查究詳辦卽如

馬海等二犯何以至今又寂寂無聞也該州勿以有此案一據遂可了事也慎之仍錄批報明撫部院並候批示繳

批龍陵廳等會詳婁學祥家被劫獲犯由

盜匪強劫所糾夥黨必多其是否止於十一人本部堂何能懸斷惟查核現在獲犯五名又起驗犯屍一具恰倅成獲犯過半兼獲首犯樣子其爲該廳縣扶同做案抹匿真情斷不止於十一人毫無可疑至於把風接贓皆係依樣葫蘆裝點捏飾强案就例之陋習殊不知例內雖有法無可貸情有可原二層而例內並無案案

必須有情有可原之犯之明文該廳縣昏而不知耳此
案犯數既不實犯供又不確且將首犯做在死者身上
不過爲獲犯過半兼獲盜首即可免叅地步現在盜賊
縱橫良弱受害地方官當思鋤暴安良方爲無忝厥職
似此做案消案欲免於叅也得乎再六月十七日獲犯
乃稱以閏八月初七會審之日起限亦屬紕繆仰署雲
南按察司先嚴行申斥並飭永昌府督同該廳等悉心
嚴審所糾夥黨實有若干如何入室強劫搜贓此外有
無不法別案錄取實供另行通詳核辦倘再飾混及逆
犯不能全獲定卽提省審辦嚴行叅究仍候撫部院批

示繳格結存

批平彝縣詳陸奉家被賊行竊臨時行強拒傷事
主之妻身死由

該縣於此案早已付之度外本不愿辦故半年之久不詳不訊迨事主赴省上控經本部堂嚴切批飭始倉皇失措無可如何姑以一詳塞責了事並自以爲照盜案開叅已遵奉批示辦理而我之玩視民瘼始終擱置上司將無如我何矣其詳文之牴牾不勝枚舉卽如詳稱六月初二日將陸奉之堂姪陸德明於貴州興義府查傳到案訊供云云夫六月初二日上距六月初一只兩

日耳其間不能以寸而詳首乃稱卑職六月間前往離城三站地方查辦防堵旋署途次訪聞陸奉家有被竊殺死事主之案差傳事主因病未到等語核計時日至快當不下六七日何以忽然接稱嗣於六月初二日將事主之姪傳到云云竟不知該縣所謂六月間之間字係指何日倘謂下鄉辦防堵途次聞盜案傳事主未到傳事主之姪已到卽總在初一初二兩日之間直不解該縣用何縮地之方繫日之術走如許多路辦如許多事奇矣醉生夢死該縣其人耶鬼耶本部堂實不勝駭愕此一節任意混謗其餘無一言之可信尙待問耶如

所稱推門入室臨時行強是有司倣案鋼習也所稱夷俗避忌相驗從古至今未聞此語也所稱陸奉住居深山雨水連綿致稽相驗可謂千古奇談千古笑柄矣所稱陸費氏委係生前受傷身死親驗無異而陸奉供內又曰女人因傷得病身死故作騎墻之語則又該縣之戶居餘氣不自覺其語之涉讐者矣至溫五十徐有林旣已獲案正當從此訊供根究庶幾案情可得乃詳內略而不言止於夾單內一爲點逗以供詞狡展了之尤可謂別有肺腑者以此等人而使之躬居民上爲民父母本部堂先不禁媿汗浹背矣仰署雲南按察司速飭

曲靖府立將此案提府親行審辦一面會同布政司將該縣撤任叅辦仍錄批報明撫部院并候批示繳再該縣另稟紅單無一是處不值批示并發該司閱看仍繳批新平縣稟訪獲棍徒萬保鈴糾眾逞兇訛詐由據稟已悉查萬保鈴旣糾約十數人以爲幫護則所供並無結盟不法殊難憑信該犯旣有夥黨多人常於偏僻村鎮相聚意圖訛詐則詐擾自非一次受害之人必多何以出示招告只有王紹青以口角被其刃傷呈控總由該犯素日強橫夥黨不止此數被害者慮恐呈控到官不加嚴懲一經釋放必被報復是以隱忍減默該

縣既將此等棍徒掣獲自應嚴行審究盡法重辦乃竟任其狡卸殊非實心任事整頓地方之道仰署雲南按察司速飭該縣提犯悉心研訊所糾夥黨實有幾人是何名姓趕緊緝拏到案嚴行審鞫究係如何糾結有無燒香拜把如何逞兇擾害被害者何人擾害實有幾次得贓各有若干務須逐一究明據實錄供通詳核辦毋得草率含混避就開脫有干參究至請仿照黔省繫帶鐵桿等情已經撫部院於四月內條

奏抄稿飭行在案並卽飭知仍候撫部院批示繳白稟並發仍繳

批麗江縣詳唐得等刀傷趙國俸並歐傷差役和
升由

該犯等夤夜無故在街鑼鼓驚擾經鄉約阻禁輒敢持
刀逞兇嗣又聚集一處拒捕傷差揆其情形恐是一班
香把仰署雲南按察司速飭提同前獲各犯再行研審
如何聚衆橫行逞兇拒捕該犯等是否盟黨有無另犯
不法別情務須嚴行根究錄取確供從重懲辦毋得開
脫輕縱更不准畏難貪懶並不再審仍照原詳任聽陋
幕敷衍申說數語搪塞了案致干叅究慎之仍候撫部
院批示繳

批元江州詳張維清等被李二黑等搶劫拒傷由
此案失事地方謂無塘房墩臺可也不能無專管汎地
該汎弁汎兵不知死在何處偷安吸烟全不管事除另
札營查究外查此案聚眾兇搶殺人直與流寇無異該
州延至四個月之久尙不詳報迨經隣封代獲得數犯
該州自知行將卸事始不得已草草一訊一詳以此等
殺人強劫之案仍復做出雖由謂係賒米不遂糾毆順
搶殊不知卽真係因賒米不遂藉詞糾劫於此一班强
徒兇暴情罪有增加無末減也且張成林旣已同搶如
何肯不分贓似此草率支離供詞該州公然上詳是不

知人間有羞耻事者仰署雲南按察司飛飭現署州另行訊供詳報一面會營加派兵役再限一個月將案內所有逸犯設法全數弋獲嚴審究報不准以犯逃隣封夷地藉口諉延更不准以案係接緝稍行鬆勁致干特叅至該州庸冗廢弛應如何叅懲之處該司卽會同布政司迅速核議詳辦仍錄批報明撫部院並候批示繳

吳文節公遺集卷五十四目錄

公牘

批姚州詳陳徐氏家被竊由

批姚州換詳陳徐氏家被劫由

批楚雄府等會詳姚州陳徐氏家被劫一案覆訊

通報由

批臬司詳姚州陳徐氏家被劫一案由

批昆陽州詳緝獲搶奪王文泉案內賊犯李小老等由

批江川縣詳拏獲昆陽州王文泉被搶案內首犯

由

批昆陽州詳吳楷被楊俸舒搭傷身死由

批路南州詳謝雙潰行劫羅俸誥家由

批臬司詳路南州謝雙潰行劫船戶馬回子錢文由
批阿迷州詳楊自願姦所獲姦登時砍傷姦夫段
爲發身死由

批阿迷州稟段之道等呈控楊自願將段爲發截
路圍殺誣姦等情屢傳潛避由

批嶍峩縣詳夷民方有芒等因向叔母方趙氏強

借威逼逼令落等身死屍被獸食由
批彌勒縣稟緝獲張洪暢被搶案內夥賊陶正發
等因傷因病身故由

批彌勒縣稟續獲張洪暢案內逸犯由

批永善縣稟拏獲鄰省糾眾結盟各犯由

批武定州稟客民平定邦被搶獲犯由

吳文節公遺集卷五十四

男養原謹編

公牘

批姚州詳陳徐氏家被竊由

此案賊犯邱汝潰等聚眾至廿一人之多天下斷無二十餘人行竊之理古今從無二十餘人行竊之案且明火持械拒傷事主其爲強劫無疑該州故意改劫爲竊以盜火改作竊火又以起意之犯改作不入室又作出許多接贓之犯又以拒捕首從僅止四犯餘皆不在場又佔贓故短二兩零使之不逾貫種種縱盜殃民可恨

已極此案本係強劫盜案必應據實審正該州遇事糊塗恐難膺民社之任仰署雲南按察司先行嚴飭上緊會營勒緝逸犯務獲究辦並令將現犯再行研審糾劫拷烙確情另詳核奪卽一面會同布政司察核該州應否撤叅迅速稟覆切切仍候撫部院批示繳贓冊存

批姚州換詳陳徐氏家被劫由

此案賊犯糾夥二十一人之多明火持械拒傷事主前經批飭研審另詳乃該州仍是廻護初報竊字改爲臨時行強又做出許多瞭望不知強情之人此一班游匪非嚴懲不可而該州必欲曲法開脫之想必此到案之

賊並非正盜該州不過藉人銷案爲搪塞計故問心不過不忍置之於法非然者何以千方百計總要捏造無情理之供一似與強盜有親故者然是誠何心可恨已極仰署雲南按察司嚴行申斥另行研審糾夥強劫入室搜賊拷烙事主確情錄取切供通詳核辦倘再仍前捏飾輕縱定卽嚴叅不貸仍候撫部院批示繳附驗擲還

通報由

批楚雄府等會詳姚州陳徐氏家被劫一案覆訊

據該府等附詳稱盜犯因知事主家無多人不用明火

一語已屬無理而時當半夜事主堂屋尙有燈光更屬毫無情理如此一班兇盜豈有十幾人都是膽小害怕之人不知該府等是何肺腑忍出此言總不過爲管令廻護原詳依違遷就不顧其謊詞之悖謬也可恨已極仰署雲南按察司速飭現署府另行親提研審確情另詳核辦仍嚴飭姚州加差上緊嚴緝逸犯晏老五等迅速按名務獲究報毋稍疏縱仍候撫部院批示繳

批臬司詳姚州陳徐氏家被劫一案由

將現犯辦成九名法無可貸除已死一名仍係八名又八名辦成情有可原自以爲得平矣曾亦思在逃之四

犯已預先辦成情有可原矣活罪多於死罪卽論辦法
先已不平况案須核實不能講辦法盜案正須核實從
嚴滇省多盜之省之案尤須核實從嚴此案祇因該令
昏憒荒唐初報諱盜爲竊以致展轉迴獲祇能略爲更
動不敢從實著手而官方之不肅盜風之不戢不暇顧
矣仰另委誠實之員另審另辦管令諱盜爲竊支離倣
案亦不能援初審之例記過了事也卽錄批報明撫部
院並候批示繳附驗並發

批昆陽州詳緝獲搶奪王文泉案內賊犯李小老
等由

此案首夥十人拒傷事主已屬兇暴眾著卽不執持器械亦應照糧船水手問擬乃將器械改爲鐵頭烟袋意存開脫捏造假詞當此盜賊縱橫不思從嚴懲治免爲良民之害而欲以此積陰德養癰貽患置良民於不顧所謂陰德者安在耶仰署雲南按察司速飭上緊嚴緝逸犯務必全獲不得以獲犯及半了事一面再提現獲各犯嚴訊如何持械搶奪拒傷事主確情另行錄供通詳核辦倘敢遷就輕縱定卽嚴叅不貸勿稍泄視仍候撫部院批示繳

批江川縣詳拏獲昆陽州王文泉被搶案內首犯

由

查何春卽小何供首夥十一人張么大用刀砍傷事主
其爲夥眾十人以上執持器械毫無疑義而昆陽州前
詳此案僅止十人並未執持器械係以鐵烟袋拒傷本
部堂當卽覺其不實嚴飭另審在案茲據詳前情仰署
雲南按察司飛飭昆陽州洗心滌慮另行審詳如再敢
迴護支吾卽由司嚴揭請叅勿稍姑息仍候撫部院批

示繳

批昆明州詳吳楷被楊俸舒搭傷身死由

此案楊楚身列膠庠以村婦穢鋤詬訴毫不干已之事

強欲出頭爭勝已屬情類棍徒陳鳳岡以一貢生而能役使州差李得培並不稟官卽擅使白役下鄉鎮人索詐陳鳳岡實爲棍徒之尤李得培實爲衙蠹之首其平日城狐社鼠串同魚肉良民者不知凡幾所供顯有不實不盡至楊俸舒是否亦係差役果否係適傷致死供情亦甚含糊仰署雲南按察司速飭雲南府將全案人證提省虛衷研鞠務得一切實在真情嚴究確鑿錄取切供通詳核辦不准絲毫徇縱至前署州鈕令旣失察蠹役如此橫行案擱半年亦不詳報現任知州以三月十三日所出之詳至六月十四日到省萬無此理其爲

倒填無疑均有應得之咎一併隨案附叅仍候撫部院
批示繳格結存

批路南州詳謝雙潰行劫羅俸誥家由

查羅俸誥呈報被賊多人撞門入室何以供內又止稱見四人明火執杖進院此該州代爲倣供不自覺其言之矛盾也所稱同夥九人不過爲獲犯五人業已過半希圖免叅耳各犯俱係塗面事主受傷後卽行躲避未能指認何人入室拒毆何人在外接贓其爲捏造顯然此等持械強劫拒傷事主之案該州並不詳細推鞠認真辦理乃狃於積習施其倣案銷案伎倆率以把風接

贓聲敘輕縱兇頑玩視民瘼不以整飭地方爲務可恨已極仰署雲南按察司嚴行申飭卽飭該代理州再行提犯研訊同夥實有幾人速卽籤差嚴緝按名全獲錄取入室搜劫真供另詳核辦倘敢泄玩圖以獲犯過半了事並以把風接贓等情虛捏開脫定卽撤省叅辦勿貽後悔凜之並飭將傷斃之謝小三首級移取於犯事地方先行臬示以昭炯戒仍候撫部院批示繳贓冊存批臬司詳路南州謝雙潰行劫羅俸誥家一案由滇省盜風日熾幾至民不聊生此等糾眾強劫兇傷事主之案亟應從重懲治方足以息盜風而靖地方此案

經本部堂暨撫部院批飭嚴審據實詳辦何得仍以許多在外把風接贓開脫輕縱殊非整飭之道現旣招解到省仰卽遴委賢員另行嚴審據實錄取確供按擬懲辦不准遷就開脫迴護原招徇原審官之情而致干扶同私罪處分切切卽錄批報明撫部院並候批示繳原招附驗發還

批昆陽州詳謝洪順等行竊船戶馬回子錢文由查馬回子係船戶窮民積錢三千五百文自應嚴密收藏斷無置放客人坐旁不鎖箱子之理次早謝洪順等起身上岸該船戶自必留心箱內之錢啟視跟究乃當

時並未於謝洪順等身邊拏獲贓據而云過後查找不到究係何人偷竊該船戶且不能自知現在並無贓據遽謂謝洪順等係行竊船戶正賊殊不近情惟自蒙自回川省何以走到昆陽又由昆陽繞道省城是否必由之路抑係不應行走前武定州具稟謝洪順身有刀傷杖痕均須逐一跟究方能水落石出細核此案供情可疑甚多枉與縱均難信心該州又將受傷一層抹煞不提更屬可疑仰署雲南按察司速飭該州再提謝洪順等虛衷研審務得確實真情具稟核奪既不准燬煉成招強入人罪亦不准草率從事開脫匪徒總期無枉無

縱以成信讞萬勿預存成見迴護原詳切切仍候撫部院批示繳

批阿迷州詳楊自顧姦所獲姦登時砍傷姦夫段爲發身死由

此等極易了結之案前署州周牧閣置九箇月有餘並不詳辦其公事之廢弛何如查現在詳冊屍格不獨紙墨如新卽硃字亦毫無擦動其爲李署牧因司中批發屍親刁控呈詞始知州中有此一案趕緊查出補詳毫無疑義其附詳所稱鋪遞沈匿並稱係周牧查出未及詳報卸事等語皆李牧贍徇同官費盡氣力爲之說謊

亦屬積習可惡仰署雲南按察司會同布政司將周署
牧記大過二十次註冊以觀後效李署牧嚴行申斥卽
飭該署州李牧速行議擬詳結仍候撫部院批示繳格
結存

批阿迷州稟段之道等呈控楊自願將段爲發截
路圍殺誣姦等情屢傳潛避由

此案緣周署牧閣置未詳以故書差訟棍屍親從而生
心謂官如木偶可以設法拖累詐錢今知此案已辦故
匿不到案耳地方官不辦公事之貽誤如此可勝浩歎
仰署雲南按察司卽飭該署州旣不必傳被告亦不必

拏原告兩月不到照例詳銷可耳仍候撫部院批示繳
稟單並發卽繳

批鬱峩縣詳夷民方有芒等因向叔母方趙氏強
借威逼致令落筭身死屍被獸食由

據訊趙廷章往胞姊方趙氏家看望適見方有芒方小
六來向方趙氏恃強逼借銀兩方趙氏從後門逃出躲
避其時趙廷章卽各自回家耶則所謂方有芒等等到
天晚不見方趙氏回家也就走散之言茫無根據趙廷
章仍坐在方趙氏家耶默無一語已屬大奇等到天晚
方有芒等走散方趙氏未回亦不向各處找尋毅然回

家安寢從容不迫直至次日始出外找尋有是理乎且所謂出外找尋者係先到方趙氏家探望不見而後出我耶抑徑從自己家中出外找尋耶若從自己家中出外我尋則何以逆知方趙氏之一夜未回耶况前夕方趙氏未回方趙氏家又無別人趙廷章翩然徑歸其門戶交與何人倘方趙氏家尙有別人則該縣何以不傳訊此案服制攸關屍傷慘酷所有緊要見證只趙廷章一人而此等無情無理之供斷非原供真供非紕繆不通之陋劣書幕所爲卽昏庸闖蕡之縣官不知讞案至屍姪供內之失跌落簪一語誰見誰聞憑虛臆造更

不待駁矣案情恐有兇毆推跌追跌重情本任楊令兼理羅令均不能辭草菅人命之咎仰署雲南按察司先將楊令羅令各記大過一次會同藩司註冊並速飭選差幹役並飛關隣封營邑一體嚴緝逃兇方有芒等務獲究報一面先傳趙廷章再行妄訊確供另稟察核仍候撫部院批示繳格結存

批彌勒縣稟緝獲張洪暢被搶案內夥賊陶正發等因病身故由

據稟緝獲搶犯小李保畏罪撲江溺斃並續獲夥犯陶正發柯二二名訊供後因傷因病身故緣由已悉此案

初亦尋常搶案繼乃奪犯奪贓傷差斃差盜黨不及十人而盜械森羅肆行無忌其目無法紀至於此極者皆前此地方官遇案不辦廢弛姑息之所致也若再不嚴拏痛懲地方不可問矣仰署雲南按察司速飭該署縣並飭阿迷州各各懸賞購線遴派幹役會營一體上緊設法嚴密偵捕務將此案兜盜限一月內按名弋獲究報不准一名漏網致干叅究至淹斃之李小保傷斃病斃之陶正發柯二並飭該署縣速卽戮取首級開明案由於通衢懸竿梟示以儆兇頑要要仍候撫部院批示

繳

批彌勒縣稟續獲張洪暢案內逸犯由

據稟已悉查該犯等目無法紀罪大惡極旣因病故倖逃顯戮均應梟首示眾方足以遏兇風而靖盜藪仰署雲南按察司速飭將該犯李幗泰等戮取首級於犯事地方懸竿示眾其王盈李起二犯最爲緊要飭卽加差兵役嚴密偵捕務期迅速弋獲究報至趙擇一名旣經訊明並未助勢係屬無辜應卽省釋毋稍拖累仍候撫部院批示繳供摺存

批永善縣稟拏獲隣省糾眾結盟各犯由

據稟及另單均悉此案已據稟會同撫部院飛咨四川

督部堂轉飭查緝審辦該縣與西昌緊鄰昭東兩府均與四川接壤此等結盟拜會匪徒黨羽最眾旣恐川匪竄入滇境且難保滇境不先有勾結入夥之人仰署雲南按察司卽抄錄批稟分札飛飭昭通東川二府及所屬各廳州縣分防佐雜地方一體會營加派兵役隨時密訪嚴拏無論川匪滇匪無論現犯已供出有名之匪匪及現犯未供出潛伏之會匪總須搜捕盡淨以絕根源倘該有司不知輕重泄沓視之任令此等會匪蔓衍成羣卽不滋事一經訪聞恐該有司等難當此重罪也凜之切切仍候撫部院批示繳稟單存

批武定州稟客民平定邦被搶獲犯由

現屆冬令各處劫搶之風又復肆起該有司等平日既不講求捕務遇案猶不上緊偵捕獲得一二從犯必思設法消弭可恨已極此案斷不止五人亦斷不是空手滇省游手匪民平日無故尙皆帶刀豈有糾眾上盜行搶而肯空手者乎該署州不過做輕案情爲寬假叅處地耳仰署雲南按察司嚴行申斥速飭會營加差兵役上緊分途偵緝勒限十日務將此案贖賊迅卽全獲研審糾搶人數次數並究明何人持何器械務得確供據實從嚴重辦倘敢違延屆限不能全獲贖犯獲犯不肯

切實重辦卽由司專揭指叅仍候撫部院批示繳